

Aneks IV Naloga supervizora od 26. juna 2007. godine kojim se donosi niz zakona i izmjena i dopuna zakona distrikta Brčko u skladu sa Nalogom supervizora od 02. februara 2007. godine kojim je izmijenjen Statut distrikta Brčko

**ZAKON
O DIREKCIJI ZA FINANSIJE
BRČKO DISTRIKTA BOSNE I HERCEGOVINE**

I. OSNOVNE ODREDBE

**Član 1
(Predmet zakona)**

Ovim zakonom se uspostavlja Direkcija za finansije Brčko distrikta BiH (u daljnjem tekstu: Direkcija) i propisuje njeno osnivanje, organizacija, upravljanje i nadležnost.

**Član 2
(Definicija)**

U smislu ovog zakona izrazi koji se koriste imaju slijedeća značenja:

- a) **javni prihodi** su porezni prihodi, neporezni prihodi, prihodi od sopstvenih izvora, grantovi i ostali prihodi koji se obavezno prikupljaju i polažu na jedinstveni račun Trezora i isplaćuju s jedinstvenog računa Trezora (u daljnjem tekstu: JRT);
- b) **investiranje** finansijskih sredstava je deponovanje jednog dijela raspoloživih sredstava s JRT-a u poslovne banke, koja za određeni vremenski period nisu potrebna za izvršenje budžetskih obaveza;
- c) **budžet** predstavlja propis Skupštine Brčko distrikta BiH (u daljnjem tekstu: Skupština) kojim se reguliše plan finansijskih aktivnosti, iznosa prihoda i primitaka, te utvrđenih izdataka i drugih plaćanja za period od jedne fiskalne godine;
- d) **glavna knjiga Trezora** je sistematska evidencija transakcija i poslovnih aktivnosti, prihoda, izdataka, stanja imovine, izvora sredstava i obaveza Brčko distrikta BiH (u daljnjem tekstu: Distrikt), koja s JRT predstavlja osnovni sistem upravljanja javnim izdacima Distrikta;
- e) **JRT** je sveobuhvatni račun Trezora koji se sastoji od depozitnih računa, računa za investiranje i zaštitu sredstava, transakcijskih računa i računa za posebne namjene, na kojem su zabilježene sve finansijske operacije i na kome se nalaze sva budžetska sredstva.

II. DIREKCIJA ZA FINANSIJE

**Član 3
(Status)**

Direkcija se uspostavlja kao organ javne uprave Distrikta u skladu sa Statutom Distrikta (u daljnjem tekstu: Statut).

Član 4 (Sjedište i pečat)

- (1) Sjedište Direkcije je u Distriktu.
- (2) Direkcija ima okrugli pečat koji sadrži tekst: "Bosna i Hercegovina Brčko distrikt Bosne i Hercegovine" kružno ispisan latiničnim i ćirilničnim pismom, sa riječima "Direkcija za finansije" ispisan u sredini pečata, na oba pisma.
- (3) Bliže odredbe o broju, veličini, obliku, sadržaju i upotrebi pečata utvrdit će se aktom Direkcije u skladu sa Zakonom o pečatu Brčko distrikta Bosne i Hercegovine.

Član 5 (Organizacija)

- (1) Direkciju čine:
 - a) Kancelarija direktora;
 - b) Trezor;
 - c) Porezna uprava.
- (2) Kancelariju direktora čine šef Kancelarije i stručni savjetnici direktora, čije nadležnosti se utvrđuju u organizacionom planu Direkcije.
- (3) Trezor je odgovoran za planiranje, izvršenje, glavnu knjigu i kontrolu budžeta.
- (4) Porezna uprava je odgovorna za utvrđivanje, kontrolu i naplatu poreznih prihoda.
- (5) Djelokrug rada, ovlaštenja, odgovornosti kao i ostala pitanja od važnosti za funkcionisanje Trezora i Porezne uprave je regulisano posebnim zakonima.

Član 6 (Direktor)

- (1) Direkcija ima direktora koji je odgovoran za upravljanje Direkcijom.
- (2) Direktor predstavlja Direkciju.
- (3) Direktor Direkcije ima status rukovodećeg državnog službenika i ima izvršna ovlaštenja koja su mu povjerena zakonima Distrikta.

Član 7 (Dužnosti direktora)

- (1) Direktor Direkcije je dužan osigurati adekvatno provođenje zakona iz oblasti finansija Distrikta.
- (2) Direktor je odgovoran za pružanje statističkih podataka nadležnim tijelima, uključujući Agenciju za statistiku Bosne i Hercegovine.

Član 8 (Odgovornosti direktora)

- (1) Direktor Direkcije je za svoj rad odgovoran gradonačelniku Distrikta (u daljnjem tekstu: gradonačelnik) i Skupštini za pravilno rukovođenje i upravljanje Direkcijom.
- (2) Direktor Direkcije je naročito odgovoran za:
 - a) ubiranje svih prihoda Distrikta;
 - b) investiranje finansijskih sredstava Distrikta;
 - c) dostavljanje prijedloga godišnjeg budžeta u skladu s instrukcijama gradonačelnika;
 - d) predviđanje i procjenu prihoda Distrikta kao i podnošenje izvještaja Skupštini o raspoloživosti prihoda za godišnji budžet Distrikta;
 - e) finansijsko stanje Distrikta.

Član 9 (Izbor i imenovanje direktora)

- (1) Direktora Direkcije imenuje gradonačelnik na osnovu kriterija stručnosti i obavezujuće preporuke Nezavisnog odbora za izbor kandidata u skladu sa zakonom.
- (2) Kriteriji za imenovanje direktora uključuju uslov da je direktor stručan u odgovarajućoj oblasti i da je pokazao visoke standarde poštenja i integriteta u obavljanju svog posla.

Član 10 (Razrješenje direktora)

- (1) Direktor Direkcije prestaje radni odnos u skladu sa Zakonom o državnoj službi u organima uprave Brčko distrikta BiH (u daljnjem tekstu: Zakon o državnoj službi).
- (2) Direktor Trezora obavlja dužnosti direktora Direkcije, po prestanku radnog odnosa iz stava 1 ovog člana.
- (3) Obavljanje dužnosti iz stava 2 ovog člana traje najduže 3 mjeseca.

Član 11 (Sukob interesa)

Direktor Direkcije ne može obavljati nikakvu drugu funkciju u javnom ili privatnom sektoru za vrijeme trajanja njegovog imenovanja, niti može biti član političke stranke ili na bilo koji način uključen u neku političku aktivnost, a u skladu sa Zakonom o državnoj službi.

III. DJELOKRUG RADA DIREKCIJE

Član 12 (Nadležnost)

Nadležnosti Direkcije su:

- a) prikupljanje i raspodjela javnih prihoda Distrikta;
- b) provođenje politike u oblasti finansija Distrikta;
- c) donošenje provedbenih propisa iz oblasti finansija i njihovo objavljivanje u Službenom glasniku Brčko distrikta BiH;
- d) provođenje zakona i drugih propisa;
- e) davanje mišljenja o primjeni propisa iz oblasti finansija;
- f) podnošenje izvještaja Skupštini o raspoloživosti prihoda za godišnji budžet;
- g) učestvovanje u pripremi prijedloga godišnjeg budžeta u koordinaciji s gradonačelnikom Distrikta;
- h) dostavljanje izvještaja o izvršenju budžeta u skladu sa zakonom, a za potrebe gradonačelnika;
- i) potvrđivanje raspoloživosti sredstava za sve rashode, transfere, investicije i kretanja sredstava Distrikta na svim računima Distrikta;
- j) obavljanje drugih nadležnosti u skladu sa Statutom i zakonom.

Član 13 (Kontrola)

- (1) Direkcija vrši kontrolu utroška i opterećenja sredstava Distrikta u skladu s budžetom.
- (2) Direkcija može odobriti izdatke u skladu s budžetom.

Član 14 (Budžetska analiza)

- (1) Direkcija dostavlja Vladi Distrikta (u daljnjem tekstu: Vlada) budžetsku analizu nacrta zakona i prijedloga odluka.
- (2) Budžetska analiza se dostavlja u roku od 8 dana od dana prijema zahtjeva.

Član 15 (Izmjene budžeta)

- (1) Direkcija nadzire prikupljanje prihoda u toku fiskalne godine.
- (2) U slučaju da stvarni prihodi od planiranih odstupe za više od 10% u bilo kom predviđenom periodu, Direkcija će sačiniti izvještaj o uzrocima i razlozima nastalog odstupanja.
- (3) Izvještaj se dostavlja gradonačelniku radi pokretanja procedure izmjene budžeta.

Član 16
(Izvještavanje)

Na kraju svake kalendarske godine Direkcija podnosi Skupštini godišnji izvještaj o radu Direkcije i program rada Direkcije za narednu godinu.

IV. PRIJELAZNE I ZAVRŠNE ODREDBE

Član 17
(Revizija)

- (1) Rad Direkcije podložen je unutrašnjoj kontroli i reviziji u skladu sa zakonom.
- (2) Direkcija je dužna saradivati s licima određenim da vrše kontrolu i reviziju.

Član 18
(Primjena)

Odredbe članova 9 i 10 stava 1 i člana 11 ovog zakona primjenjuju se i na direktora Trezora i direktora Porezne uprave.

Član 19
(Organizacioni plan)

Direktor Direkcije u roku od 30 dana od dana stupanja na snagu ovog zakona donosi organizacioni plan Direkcije.

Član 20
(Stupanje na snagu)

Ovaj zakon stupa na snagu 8. (osmog) dana od dana objavljivanja u "Službenom glasniku Brčko distrikta BiH".